



粉紅色个腰帶

這幾年，春天時行滿哪去邊山花。冬節過撇無已久，梅花斯開咧，滿山滿坑白雪雪，梅花个香味遠遠斯鼻得著，行俚去也毋會徑鼻，香味當高雅。一兩禮拜過，淺紅色个山櫻花、白色个李花、梨花同新娘色个桃花像接力个樣續核開，歸樹个花蕊相爭開去榮榮榮，連掖在梨園肚做綠肥个油菜，也開出淦黃个花來鬥鬧熱，錫來糖蜂同蝶。春天个莊下，靚都像一幅畫。

吾屋面前个大路脣，種有一排接過个櫻花，逐年春天櫻花共下開，遠遠看過來斯像紅色个濛紗，風吹過，開煞个花蕊斯跔風跌落來。幾日過，樹下也鋪一層紅紅个花地毯，講有幾靚都有幾靚，莫講過路个人客，連吾等也會去花樹下翕相。其實，恁靚个櫻花毋單淨種在吾屋面前个大路脣忒等，係莊頭到莊尾五、六公里長个路脣做下有種這種櫻花，開出來个花蕊啾紅、多瓣又耐開，係當靚个花種。

本來吾等莊項少人種櫻花，大約十年前，莊肚个徐阿奶發心想美化社區个環境，斯招鄰舍退休个阿伯、伯姆共下來掃大路。有厥等个維持，一站時間過後，社區道路也變都當淨俐咧。徐阿奶又去買幾十頭山櫻花秧轉來，過尋兜後生人手同這兜櫻花秧種落大路脣，間日淋水、一兩個月斯愛去落肥、擲草。慢慢櫻花樹較壯旺咧，徐阿奶又尋來較素絲个「櫻花紅」來接落本个山櫻花項。路項上上下下个人，長在看著徐阿奶帶核幾個老人家在該整理櫻花樹。有兜人笑佢做蠢事，大路脣種花、種樹做白工；有兜人也當感心，會送兜點心、涼水分厥等食。毋管別儕仰脣看，徐阿奶還係堅持愛同櫻花顧靚來。頭擺有「移山个愚公」，佢斯像係現代「種櫻花个蠢阿奶」。

接過紅个櫻花行水了第二年，開出幾桎啾紅个花蕊。徐阿奶當歡喜，過較認真顧櫻花，淋水、落肥、擲草、上土，櫻花也當增志，日視日、年視年抽高、壯旺，一年比一年開較多花。漸漸，歸條大路个櫻花做下開來當靚、當素絲，過路个人客也會停落來看花、翕相，連聯合報个記者也分這花錫來報導。該個記者阿腦這兜紅紅、靚靚个櫻花，開淦淦在這條長長个大路脣，對對面看過來，已像一條粉紅色个腰帶繫在河排山个肚側賺。莊項个人，試著這個報導係歸莊人个光榮，感謝徐阿奶認真照顧櫻花、改善社區環境，開始跔核徐阿奶共下掃大路、照顧櫻花。徐阿奶看著大家態度轉變也當暢，還係逐日歡歡喜喜繼續做事。

這站天時較燒暖，路脣个櫻花也開去紅放放、鬧借借，共樣錫來看花个人潮。還記得該年「粉紅色腰帶」个美名同莊項人共心照顧社區个情形，毋過，該愛家園、用心種花个徐阿奶既經無在咧！單淨留分吾等靚靚个櫻花同深深个思念。

作者：徐姿華

☆詞彙學習☆

【徑鼻】gang` pi`：嗆鼻、刺鼻。

【接過个櫻花】ziab` go` gai+ rhin+ fa+：嫁接過的櫻花。

【間日】gam` ngid`：隔一天。

【壯旺】zong` vong`：強壯、茂盛。

【櫻花紅】rhin+ fa+ fung`：供嫁接的櫻花花苞。

【接過紅个櫻花】ziab` go` fung` gai+ rhin+ fa+：嫁接過花苞的櫻花。

【行水】hang` shui`：花苞嫁接成功，已能吸收母株的養分。

【肚側賺】du` zed` rham`：腹腰兩側。

【紅放放】fung` fang` fang`：紅通通。